



上海古籍出版社

【清】顧炎武 撰 嚴文儒等 校點

熹廟諒陰記事

（外五種）

顧炎武全集



国家出版基金项目
NATIONAL PUBLICATION FOUNDATION

上海古籍出版社

【清】顧炎武 撰 嚴文儒等 校點

熹廟諒陰記事

（外五種）

顧炎武全集

圖書在版編目 (CIP) 數據

熹廟諒陰記事:外五種 / (清)顧炎武撰;嚴文儒等校點. —上海:上海古籍出版社,2012.7

(顧炎武全集)

ISBN 978-7-5325-6479-8

I. ①熹… II. ①顧… ②嚴… III. ①宮廷—政治鬥爭—中國—明代 IV. ①G691

中國版本圖書館 CIP 數據核字(2012)第 092369 號

顧炎武全集

熹廟諒陰記事(外五種)

[清]顧炎武 撰

嚴文儒等校點

上海世紀出版股份有限公司 出版
上海古籍出版社

(上海瑞金二路 272 號 郵政編碼 200020)

(1) 網址: www.guji.com.cn

(2) E-mail: guji1@guji.com.cn

(3) 易文網網址: www.ewen.cc

上海世紀出版股份有限公司發行中心發行經銷

安徽新華印刷股份有限公司印刷

開本 890 × 1240 1/32 印張 21.625 插頁 5 字數 450,000

2012 年 7 月第 1 版 2012 年 7 月第 1 次印刷

印數: 1—700

ISBN 978-7-5325-6479-8

 1591 定價: 98.00 元
如有質量問題,請與承印公司聯繫

本冊總目

熹廟諒陰記事	一
聖安紀事	二三
明季實錄	五九
歷代宅京記	二二三
昌平山水記	五九三
營平二州地名記	六四一

烹廟諒陰記事

嚴文儒校點

校點說明

熹廟諒陰記事，不分卷。以編年形式記載自明泰昌元年（一六二〇）九月光宗駕崩，明熹宗繼位，至該年年底這一時期朝廷中發生的爭鬥。

晚明時期，圍繞皇位傳承，先後發生「梃擊」、「紅丸」、「移宮」三大案，迷霧重重，當時及後人均有不少疑惑，至今難釋。顧炎武自稱早年即有撰修兩朝紀事的打算，先成此卷。所本者，爲其祖父當時手錄邸報。惜「止紀大事，其遷除月日，多有未詳」^{〔一〕}。顧炎武遂別購明天啓以來人家所藏邸報，歲月相續，幾於完備。不久爲友人潘耒章借去。顧炎武客游天下，潘耒章遭禍以死，在潘耒章處的邸報亦散失無存。顧炎武雖求諸四方，但邸報已不可復得。然而，對於晚明三大案，後世傳說紛紛，且「日遠日訛」^{〔二〕}，致使真相難明。顧炎武自度衰老，不能完成兩朝紀事的撰修，而此卷又是明熹宗初政三案之發端，內容詳備，「復不可泯」^{〔三〕}，遂錄而存之，名曰熹廟諒陰記事。

熹廟諒陰記事向以抄本傳世，世無刻本。此次校點，即以清抄本爲底本，校正了個別錯字。

嚴文儒

二〇一〇年三月

注：

〔一〕熹廟諒陰記事卷末附顧炎武跋。

〔二〕同上。

〔三〕同上。

目 録

校點說明	三
------	---

熹廟諒陰記事	七
--------	---

熹廟諒陰記事

熹宗達天聞道敦孝篤友文章文襄武靖穆莊勤哲皇帝，光宗皇帝長子，母曰孝和皇太后王氏，以萬曆三十三年十一月十四日生，四十八年八月命擇日立東宮，欽天監以九月癸未上，許之。

九月乙亥朔，光宗崩。

英國公張惟賢，太子太保、禮部尚書兼文淵閣大學士方從哲等率諸臣入乾清宮，哭臨畢，請見皇長子，良久乃出，羣臣叩頭畢，擁皇長子至文華殿，行五拜三叩頭禮，呼萬歲乃起。

時選侍李氏在乾清宮，皇長子尚居慈慶宮，勳戚、內閣、部院、大小九卿、科道等官並入內，直宿扈從。

是日，賜勳臣英國公張惟賢銀一百兩、紵絲四表裏，疑不止英國公一人。閣臣方從哲銀一百兩、紵絲四表裏，劉一燝、韓爌各銀八十兩、紵絲四表裏，尚書周嘉謨、李汝華、孫如游、黃嘉善、黃克纘各銀五十兩、紵絲四表裏，不及都御史，抄失之也。考是張問達否？吏科都給事中范濟世、河南道御史顧慥各銀四十兩、紵絲二表裏，鴻臚寺寺丞李可灼銀五十兩、紵絲二表裏。

丁丑，成服。禮部請皇長子以庚辰登極，許之。

先是，光宗皇帝命冊封李氏爲皇貴妃，以庚辰日上。會駕崩，令旨已允行矣。及擇登極日，復用庚辰，因啟二禮難於並舉，命更擇日冊封。而選侍在先帝時怙寵，意羣臣不欲封之也，因留乾清宮不去。

先一日，吏部尚書周嘉謨等公啟請奉梓宮於仁智殿，選侍移居後殿。御史左光斗又獨上言：「內廷之有乾清宮，猶外廷之有皇極殿也。惟皇上御天居之，惟皇后配天得並居之。其餘妃嬪雖以次進御，遇有大故，即移別殿。歷代相傳，未之有改。今大行皇帝賓天，選侍李氏既非嫡母，又非生母，儼然居正位，而殿下乃居慈慶，不得守几筵，行大禮，典制攸乖，名分倒置，臣竊惑之。且聞李氏侍先皇，無脫簪鷄鳴之德；待殿下，又無撫摩鞠養之恩，此其人豈可以托聖躬者。在皇祖時請名封而不許，即貴妃之命，亦在先皇彌留之時，其意可知。且封妃之命，行於先皇爲順，行於殿下，則尊卑之稱，亦斷斷有不可者。及今不早決斷，將借撫養之名，行專制之寔，武后之禍，復見於今。臣誠有不忍言者矣。望殿下收回遺命，仍令守選侍之職，或念先皇遺愛，姑與以名稱，速移別殿。殿下仍回乾清宮，守喪次而行大禮，則宮禁清，名位正，宗社之靈，實式憑之矣。」疏未下。

初，光宗大漸，廷臣咸咎御藥房提督太監崔文昇用藥不效。及李可灼進丸時，上疾已不可

爲矣，次日遂崩。外廷亦未有言者，而令旨賞大臣銀幣並及可灼，於是人情愈益不平。御史王安舜劾可灼關通內廷，有主持之者。令旨罰可灼俸一年。而御史鄭宗周劾文昇言：「張差之變，操椎禁門，幾釀不測之禍。皇祖仁慈，未盡厥辜。故文昇今日尤而效之，其所由來漸矣。乞令三法司嚴鞫有無謀使逆情事。」下司禮監。

戊寅，有旨答諸大臣及光斗啟，令擇日移宮。

己卯，兵科給事中楊漣上言：「登極已定，明日選侍偏處正宮，目無幼主。又聞今典膳局太監李進忠、劉遜等擅開寶庫，盜取珍藏，宜以義斷，速令出宮。」諸言官環集閣中，與大臣爭之，從哲等乃具揭言：「殿下明日禮成之後，即當居乾清宮，選侍必須先移出。聞大內仁壽殿規制宏敞，堪以久居。乞即傳示，早令搬移，臣等及百官謹於宮門立候批發。」漣等相率詣慈慶宮前候旨。司禮監太監王安者，事先帝東宮，素不快於選侍，爲漣等內應，啟上得旨：「即日移仁壽殿。」漣、光斗諸臣排闥而入，選侍與皇妹八公主倉皇走移去。下劉遜等獄。

庚辰，皇長子即皇帝位，以明年爲天啟元年，大赦天下。其萬曆四十六年加派地畝錢糧，通免一年。遼東軍民先年逃入海中或近日被掠者，兵部行文總督鎮巡等官，多方招徠，有率衆來歸者，酌量賞錄。

壬午，禮科左給事中李若珪請以今年八月朔先帝即位之日爲始，訖十二月，稱泰昌元年。

其七月晦以前稱萬曆四十八年。下禮部會議，從之。

癸未，司禮監以崔文昇獄上，上責文昇用藥不效，降內官監奉御。

甲申，上皇祖大行皇帝尊謚曰範天合道哲肅敦簡光文章武安仁止孝顯皇帝，廟號神宗。

工科給事中惠世揚劾從哲庇文昇，及受李進忠、劉遜盜藏美珠，主封貴妃，罪當誅。御史鄭宗周、刑科給事中魏應嘉連章劾之，從哲再疏自辨，乞去，不許。

御史馮三元上言：「李可灼陷先帝於倉卒，中外人心所共憤痛。乃賓天未幾，旋蒙恩賞，臣愚不知此賞為何名也？及御史王安舜言之，始令罰俸，臣愚又不知此罰為何名也？一事而賞罰並行，何以爲準？」可灼不自安，丙戌，上疏引疾，有旨令養病去。故事，惟九卿得旨養病。可灼以小臣得此旨，於是朝論益譁然不可解矣。

是日，以整飭永平兵備山東按察司按察使袁應泰〔二〕爲都察院右僉都御史，巡撫遼東。

丁亥，上皇祖妣孝端皇后尊謚曰孝端貞恪莊惠仁明媲天毓聖顯皇后；皇祖妣溫肅端靖純懿皇貴妃尊謚曰孝靖溫懿敬讓貞慈參天胤聖皇太后。

逮前遼東總兵官李如栢、遼東、河東總兵官李如楨下獄。如栢自經死。

癸巳，南京太常寺少卿曹珍上言：「先帝春秋鼎盛，即涉哀勞，何至一月之間，便爾殂落，道路沸傳，以爲姦黨邪謀，醫藥雜進。伏思二十年忠臣義士受杖受謫以爭冊立者，正以先帝故耳。」

此屬久蓄異志，必有一逞。實不意倉猝之中，竟售其計。陛下先帝愛子，亦未一問先帝垂沒之事，以報地下之恨乎？」先是，言官論文昇者猶隱顯出入其詞，珍疏始斥言之以爲大逆矣。

乙未，陝西撫臣李起元奏黃河水清三日。

戊戌，赤氣亘天。

自左光斗有收回封妃遺命之請，令旨下禮部再議。已而上即位，掌禮科給事中暴謙貞抄參寢其事，而諸內侍下獄者轉相攀引，連及二三大璫，以動搖貴妃鄭氏，并及選侍之父。從哲等請自科道所指數人外，勿更收捕，未允。而中外流傳有言選侍自經，八公主赴井者。御史賈繼春上書閣臣，以爲：「自古未有新君即位之初，首勸主上以違忤先帝，逼逐庶母，表裏交構，羅織不休如今日者。先帝命諸臣輔皇上爲堯舜。夫堯舜之道，孝弟而已矣。父有愛妾，其子終身敬之不忘。昔孝宗皇帝於萬貴妃也，人言嘖嘖，付之不聞。我大行皇帝之於鄭貴妃也，三十餘年，天下所共側目之鄰，而聖心曾無纖芥。祖宗家法，何不爲皇上一陳之乎？先帝彌留之日，親向諸臣言選侍，先帝恩禮不薄，而玉體未曾產數胎，育有幼女，歡歡情事，草木傷感，而況臣子乎？受先帝恩禮不薄，而玉體未寒，遂不能保一愛姬乎？願閣下委曲調護，令選侍得終天年，皇幼女不虞意外，則先帝含笑九原，而皇上垂芳萬載矣。」

左光斗亦上言：「當先帝上賓之後，人心危疑，臣隨公疏後有肅清宮禁一疏，其時但以安宗

廟、定社稷爲念，不知其他。今選侍既已移宮，自當存大體，捐小過。若復株連蔓引，使宮闈不安，則於國體不便，亦大非臣等建言初心也。」

時內廷亦知不厭人意。辛丑，上諭內閣：「朕幼冲時，皇考選侍李氏侍寵，屢行氣毆聖母，以致懷憤在心，成疾崩逝，使朕有冤難伸，惟抱終天之痛。前皇考痛篤，閣部大臣俱進內問安，選侍威挾朕躬，使傳封皇后，復用手推朕向大臣覲顏口傳。因避李氏毒惡，心不自安，暫居慈慶宮。李氏又差李進忠、劉遜等傳：『每日章奏文書先奏我看。』畢，方與朕覽，仍待即日垂簾聽政處分。御史有言李氏他日必爲武氏之禍者，朕思祖宗家法甚嚴，從來有此規制否？朕今奉養李氏於曦鸞宮，月分例供給錢糧，俱仰遵皇考遺愛，無不體悉。外廷誤聽李黨喧謠，實未知朕心尊敬李氏之不敢忘也。其李進忠等皆係盜庫首犯，贓明證確，自干憲典，勿使渠魁賄囑當事，播弄脫罪，卿可傳示該部院遵行。」從哲等具揭封還，有旨：「李氏過惡多端，未及盡悉。朕意不伸，流言奚弭。其即行發抄，使天下知之。」

從哲等上言：「選侍李氏平日怙勢張威，得罪聖母，不惟聖心含冤抱痛，無以自伸，臣等聞之，亦不勝悲憤。但事涉宮闈，不宜宣洩。且皇上既仰體先帝遺愛，奉養不缺，尊敬有加，傳之外廷，誰不贊揚聖孝。似不宜又暴其過惡，以掩盛德而滋物議也。臣等愚見如此，故一時未敢抄發。茲復蒙皇上面諭切責，不勝悚懼。除奉旨傳示外廷并發抄外，願皇上始終以先帝遺愛，

曲賜保全皇五子並二位公主，時時顧念，務令得所，則孝慈兼盡，聖德彌光矣。」上曰：「覽卿等奏，具見忠愛。朕弟妹皆骨肉至情，豈不注念。皇考選侍李氏已移居噦鸞宮，撫養所生八妹；選侍李氏居勛勤宮，撫養皇五弟；選侍傅氏居昭儉宮，撫養所生朕六妹、七妹，俱有隨從宮眷。各衙門月分年例，養贍錢糧，俱從優厚，令各得所。昭朕仰遵皇考遺愛，篤念親親之意，特諭卿等知之。」

先是，兵科給事中姚宗文閱視遼東還，奏熊廷弼隱匿敗狀。廷弼疏辨乞去。御史馮三元劾廷弼辨言欺君，庸才誤國。下九卿科道會議。廷弼請勘，御史張修德、刑科給事中魏應嘉復劾之。命廷弼解任回籍聽勘。

冬十月甲辰朔。乙巳，兵部尚書黃嘉善罷。

丙午，葬神宗顯皇帝、孝端顯皇后於定陵。

辛亥，以袁應泰爲兵部右侍郎兼都察院右僉都御史，經畧遼東。

廷弼在遼東一年，自負其無大失事，連疏與言官相計，乞令馮三元、張修德、魏應嘉至遼行勘，從之。兵科給事中楊漣、御史吳應琦等奏，以爲自古無言事之人即勘所言之事者，必更紛囂，有傷政體。不聽。大學士方從哲等復言之，改遣兵科給事中朱童蒙往。攷曰。

甲寅，命行人徵舊輔葉向高、朱國祥、史繼偕、沈淮、何宗彥入閣。